

היל אַמאַנעסער

"kuando muncho eskurese es para amanecer"



el amanecer

ESTAMBOL 11TEVET5769 7ENERO2009

ANYO 4 NUMERO 47

Anyo Va Anyo Viene, Salud, Paz i Prosperidad, estas tres demandas no trokan!

KAREN GERSON FIARHON / ESTAMBOL
karensarhon@gmail.com

Asta ke aboltimos la kara un anyo otro ya paso i na ke yene estamos aziendo planos para la dalkavo noche del anyo 2008. Este anyo no ay mucho keyf, kualo kon la kriza ekonomika ke esta emprovesyendo el mundo entero, kualo kon las ger-ras ke no ay eskapasyon i ke esta rezultando en un sirklo visiozo de agresion i de animosidad, kualo kon el klima del mundo ke se esta trokando i kualo kon todos los terremotos, tempestas i otras kalamidades ke bozdeyan los morales. En este mundo global, keremos bivar muestras propias vidas sin ser influenciados o afektados por lo ke se pasa en el mundo ama oy en diya esto ya no es mas posible porke todos ya se ambezaron ke si un pasharo bola por el yan en el este, esto kavza una tempesta en el oeste! Esto kere dizir ke todos estamos konektados, no podemos bivar como si estamos en una isla isolada; esto kedo en el pasado. Agora kale ke echemos tino a lo ke se esta pasando en el mundo i tomar muestras desiziones i azer nuestros echos en akordansia a los eventos globales.

Este anyo el interes en muestra lingua i kultura pujo mucho. Esta vez no solo investigadores de paises extranjeros ma tambien muchos mansevovos de las universidades turkas ke estan aziendo sus Master o Doktorado empesaron investigaciones muy muy interesantes sobre

muestra istoria i kultura. Por una parte yo esto muy kontente ke ay mansevovos ke estan aziendo investigaciones ama de otra parte esto un poko triste ke dingunos de estos mansevovos son judios i ke todos estos investigadores ke estan lavorando eskarvando los archivos viejos i topando dokumentos importantes i interesantes no son de los nuestros. Los ajenos se estan interesando en lo nuestro mas mucho ke los nuestros ma ke azer, esto es la vida. Lo ke me esta embarasando es ke si muestra mansevovos no se interesa en sus erensia, no tenemos muncha esperansa por el futuro. De otra parte este anyo el interes por ambezar el Espanyol (no el Judeo-Espanyol, ma ke sea...) pujo



mucho. Munchas eskolas segondaryas agora estan metiendo el Espanyol como sigunda lingua extranjera i como el Espanyol es una lingua un poko mas facil ke otras como el Franses por egzemplo, los estudiantes estan de mas i mas eskojendo el Espanyol para estudiar. En muestra eskola judia tambien agora se empeso cursos de Espanyol i esto mos da un poko de esperansa porke de una forma o otra si muestra mansevovos se ambeza el Espanyol, tendra aksesos a sus kultura mucho mejor ke antes.

Este anyo fue tambien el anyo de importantes peryitas para muestra kultura. Peryimos a personajes i pionaryos muy preziosos como Jacob Hassan, como Judy Frankel, ko-



Salud



Paz




Prosperidad

mo Isak Maçoro i como Elie Perahya, ke sus alma repozen en Ganeden. Es siempre muy difisil i a veces komo en el kavzo estas peryitas muy grandes, kaji imposible de remplasar personajes komo eyos.

Todo kon esto, no kale karadeyar lo de aryentro en empesando un anyo nuevo. Yo so una persona optimista i siempre kreyi en el motto "todo lo ke aze el Dio es por bien"; de sorte ke en lo largo de la vida, si ke ay momentos ke preferamos no bivar ma es ansina ke mos ambezamos a sobrevivir lo negro i evolucionar.

Este anyo uvo tambien kozas ermozas ke mos achilo el korason; muestra komunidad estuvo muy aktiva kon teatros, egzibisiones, konsertos, konferensias ets., a tanto ke una persona muy aktiva toparia una aktividad para irse kaji kada noche! El diya de la kultura judia europea se selebro en Galata i uvo muncha djentoria, el Limmud fue una aktividad super reushida kon miles de personas ke asistieron, 63 ijikas de 12 anyos izieron sus batmitzvas todas endjuntos en el Neve-fialom, todas vistidas de blanco, i nuestro grupo Los Pasharos Sefaradis estuvimos bolando para dar konsertos en varios payizes de la Evropa kaji kada mez asi dando a konoser muestra muzika a miles de personas.

La esperansa es el mejor regalo ke se puede dar a la persona i moztros, el ekipo de El Amanecer Güler i yo en Turkiya, i Gad i Roz en el extranjero vos regalamos la esperansa para un mundo mas feliz yeno paz, salud i prosperidad!




MOÏSE GROSMAN
Lo ke se disho
al Ayre 05



COYA DELEV
Un Kurto Viaje al
Anyo 1986 06



GAD NASSI
Sovre la Prensa
Djudia en
Turkia- 2 08
09



HERNÁN
RODRIGUEZ FISSE 11
Alitalia los
Bilyetos - I



SABETAY
TCHIMINO 14
15
La Trajedia de los
Djudios de Kavala



Festiladino
2008 24

fiALOM GAZETES' nin ücretsiz ekidir



Esperansa